

石琴廬詩集

談國楫署
第一冊



石琴廬詩集 二編 卷首一卷

共 4 册 存 4 册 排架号

10085

温州市图书馆

75.45

索书号码 B1133

登记号码 09450

共4册
(一函)

上編

詩賸

石琴廬詩集

王光



溫州府 府 文 院

石琴廬詩集卷首

王序

吾於關外得兩詩人焉一日吉林成君澹堪一日
瀋陽張君仙舫澹堪之詩如高人羽客翛然物外
相與徜徉吟嘯於泉石間也仙舫之詩澄思妙諦
清氣往來如臭芝蘭而嚼冰雪也如歌者之應絃
赴節一唱三歎也余交澹堪近十年詩酒往還無
虛日每花晨月夕媵句裁箋無不與澹堪俱者余
序其詩所稱爲豪傑之士者也余素聞仙舫之名

今秋八月始識之於熙人省長座中已復匆匆別去未獲一窺其所蘊久之始以詩徵序於余烏虜詩教之微久矣上之人既不知詩爲何事舉古帝先師之以詩教正人心而型世俗者一是土苴而擯棄之不復與於學科之列而下之僕傲狂易之徒又復信口淫哇視爲玩物其於聖人所謂興觀羣怨者概未之聞焉風雅至此掃地盡矣夫詩者史也一身之出處一家之興替以及一國之治亂興衰莫不於詩焉見之吾嘗讀史至周厲共和之

世歷十四年之久當時政治之善否民俗之醜澆
與時勢之宜與不宜未嘗一言及之及讀民勞板
蕩桑柔抑戒諸詩乃知共和之政其所以致喪亂
而痺下民者莫不痛心疾首長言永歎以發之於
詩故讀其詩者可以論其世而補史之缺焉君生
丁叔末處共和之世十七年矣國是之愴囊民生
之塗炭凡身之所遭耳目之所聞見其柴於胷而
戟於口者莫不託興寫懷假物摠憤而友朋之離
合君國之安危弔古傷今發人幽感然則是詩也

爲君一人一家之史而貞淫美刺之有關於國故者亦採風者之所不遺也抑又聞之詩與畫通君素以畫名當世論者往往以唐之王摩詰宋之蘇文忠米海岳明之董玄宰况之顧余未見君之畫而讀其詩則一草一木一山一水煙雨風雲之變態四時景物之異狀殊形見詩如見畫焉則以此詩爲有聲之畫可也君之能事尙不自秘惜頗思所以易吾文者戊辰十月新城王樹枏序

成序

遼東有詩人曰張仙舫其爲人也神閑而氣靜博
學而多能素工畫能以左右手運筆各極其妙望
之如宋元時人及遭國變默傷身世豪宕感激凡
目之所構耳之所聞一切悲歡喜怒同休同戚之
故一發之於詩詩工矣而畫益愈進昔者王輞川
嘗爲詩矣然讀其答裴迪書所謂輞水淪漣夜火
隣春犬聲如豹者固儼然畫也竊思輞川當日其
於我仙舫何如然其縱心孤往清微澹遠之意吾

知其必有合也憶昨歲余過瀋陽相見萬泉河酒樓其時野藕已花香冉冉襲人衣袂仙舫洒然而來乃相與飲酒賦詩越數日又訪日本人種松者天微雨道無行人二人者衣襦半溼坐小園中短松細草蒼翠欲滴亦相與飲酒賦詩而去吾不知仙舫此日之詩能及輞川與否然其境已自不凡詩中畫耶畫中詩耶彼烏得而知之今仙舫耶古輞川耶吾亦烏得而知之噫其可傳矣哉今年仙舫刻其詩凡若干卷既成屬序於余仙舫於詩功

之淺深境之甘苦當自得之茲不述述其詩之得
於畫者仙舫名之漢號石琴晚號遼海畫禪也
戊辰正月上元日吉林成多祿

溫河不國書院

吳序

遼東隋大海風俗勁雄夙以武功著天下文藝之
興視中原爲遜然自管邴流虜以來風教所漸至
今未沫吾意方壺蓬嶠之間必有得東方清淑之
氣洸洋蕩滂以自寓其跌宕之奇者關山重閉隔
絕曠寥爲中土之民耳目所未及耳疆土旣判聲
氣不通遏抑勃發光怪彌騁惜不得經涉遐隩周
歷瀛壖一擷其廣莫瑰琦以自壯也吾友海城于
思泊倜儻多奇銳意於古文辭雄深奧衍當世莫

能及夙爲馬通伯姚叔節王晉卿諸先生所激賞
吾固歎竒之以爲非中州所能有矣今來瀋陽思
泊爲余道運使張仙舫先生之爲人且持示其所
爲詩伏而讀之於是又知先生之賢焉夫詩歌之
作大抵盛於叔季之世士君子傷時閔俗憤結而
不得自遂乃紆回宛曲一寫其苑塞之懷二雅所
載自天保大明諸篇外大抵遭變之作耳而瞻洛
裳華桑扈鴛鴦諸什備言其福祿之同屏翰之美
韎韜鞞琫之盛雍容揄揚與盛世之寵光無異論

者謂其詞榮旨悴作者蓋有深心焉夫局躋艱危
而其詞采風華都麗敷愉如此詩人之所爲溫柔
敦厚者爲何如乃知大東北山之詩契寤歎而感
賢勞者猶未爲用情之極致也吾聞先生夙工於
畫夫畫之精者能陶寫性情自放於塵寰之外非
有高世之識者不能工意者先生之於詩即其所
以爲畫乎吾於思泊之文而外又得工詩與畫如
先生者始信遼瀋之果多奇而今日之遊爲不負
也戊辰冬桐城吳闈生序

溫州府志



卷之二

自序

綺齡猶解聲律輒喜爲古今體詩非敢以詩鳴也
亦如春鳥秋蟲任天而動自鳴其適已爾顧世變
亟矣秦坑灰冷雅頌無聲不圖蟲鳥之音亦罹龍
蛇之厄庚子甲辰烽傳遼海故園籬菊開傍戰場
亂後歸檢詩囊而狼藉劫灰酷逾秦火嗣是滄桑
迭幻感感靡甯間劈吟殘遑拾散葉綜括半生泥
爪蓋如零雨晨星矣獨念鴻雪留痕有關身世心
聲寤影忍聽銷沈用是蒐輯叢殘激思墜緒而鐙

櫳雨枕十或憶得二三羗比綴裘不忘故劍心鈔
手錄僅乃成編甲子之秋爲就正師友曾有石琴
廬麓稿之印一時宗哲頗荷甄裁茲依正本益以
近作重爲釐訂起光緒庚辰迄宣統辛亥凡六卷
爲詩賸一編起民元壬子迄本歲戊辰凡六卷爲
詩存一編都十有二卷雖節次編年中多闕佚而
存茲片鱗隻爪略可窺見生平灾梨之意如是而
已至謂享帚千金覆瓿百醬則余固已言之矣非
敢以詩鳴也瀋陽張之漢識於營川運署鏡帆樓

石琴廬詩稿卷首

題詞

瀋陽繆東霖太史潤祓

大箸筆情深至華豔動人就中尤以庚子憶
事甲辰感事以及津門萬泉河上元雜詠題
桃花扇傳奇諸作爲獨出冠時令人讀之不
忍釋手坳呈四律自知老筆頽唐倘不見棄
班門即當題詞可耳

條風轉東陸吹到好詩章問世珠無價驚人玉有

光多君一腔血照我滿頭霜喜極狂呼酒新篇出

瀋陽

幾經塵劫後迴憶在山時勵志書千軸陶情筆一

枝迹尋鴻爪舊才埒虎頭癡

君兼工六法

匪獨關天授

多師是我師

優遊公退食豪興幾人同自具神仙骨兼全洗鍊

功情饒千古豔氣挾九邊雄祖述心源在還應問

國風

星海湧迴瀾靈光聚筆端苦從盲問道驚見將登

壇癡敢吹毛索奇終刮目看點金恐成鐵翻覺報
書難

吉林成澹堪太守多祿

大詩清麗芊絲天人並至其獨到處實兼漁
洋神韻倉山性靈二家之長三復十誦欽佩
無既敬題二律以證素心

笙簧縹緲玉參差甘苦生平祇自知氣得幽燕天
所賦民如邴管古之遺名山自有千秋業並世誰
堪一字師我亦病餘識天意要留老眼看君詩

幾載編詩記晚晴

晚晴籀東海集海內名流選詩處鄙人與焉

熙朝雅

頌久無聲誰知大漠龍興地尙有寥天鳳一鳴
醫到伯休裁是隱畫兼摩詰轉無名獨將王氣歸詩
筆松杏吟殘萬古情

蜀南高蔚然觀察樹

樹丁未出守東度榆關即聞遼左多才張君
仙舫其翹楚也嗣晤同年孫鼎臣太史亦道
君才不置乃走馬訪之時君方盛年英襟雅
度溢於所聞因與縱談時局知君蓄經世學

當中東戰後封豕憂深數上書籌遼東守備
與夫靖內禦外之策當軸側席卒格於行其
磅礴鬱積之氣輒發爲詠歌旁溢爲山水花
鳥而詩乃益工索閱詩卷云經亂散失止燼
餘耳袖歸讀至春暮遊半可亭蜘蛛似欲留
春住宛轉牽絲絆海棠瞿然曰此真詩人也
題二詩卷首歸之詩見是在訂交之始即知
君之能詩矣泊辛亥去遼還京遽更國步三
川烽火無以爲家君知樹思鄉作蜀棧圖題

詞寄慰有寫出劍南山一角憑君欹枕看鄉
雲之句紀實也越歲歲寒又寫寄老梅圖并
萬泉河冬景各綴以詩亦厲彼此蕭寥之意
蓋別來眷眷君胥於詩畫傳之樹亦見詩畫
如見君懸之座右常目在之一日客來睨視
蜀棧圖良久曰如讀青蓮蜀道作者殆詩人
耶樹曰是矣抑又非也客曰何居曰不謂爲
詩人無以盡作者之詩逕謂爲詩人烏足盡
作者之人哉客乃穆然思怡然歸座相與洗

殘更茗而去時方校君石琴廬詩畢因書廿
年來相與之故與夫與客問答之詞於簡端
而繫之以詩云

帝都南北偏強鄰舉目河山感伯仁三策治安空

太息英雄無奈作詩人

昔年題君詩卷二首此其一也

三老遼東久擅場吟龕又峙瀋之陽鷓鴣黃葉援

前例我欲呼君張海棠

昔年讀蛛絲海棠詩并題即其二也

誦罷心經一事無拋來紅豆立雕笈詩人應號張

鸚鵡輝映唐賢鄭鷓鴣

今見鸚鵡似嫌人立久一丸紅豆怒拋來句又題

早播詩名徧遼海遙傳畫筆寫夔巫連朝泥煞登

堂客面壁神移蜀道圖

客來皆視蜀棧圖
往往神移忘去

遼陽袁潔珊京卿金鎧

詩心聲也非契聲韻於性命而息息相印以
心者豈足與言知音哉仙舫綺歲爲詩余交
仙舫亦在沖齡其結契之深心心相印無幾
微之或間者迄今四十有餘年矣茲仙舫梓
其詩屬余一言余又何能已於言耶至有當
知音與否則相契在性命之微恐非詞筆之

所能宣耳爰爲之詞曰

共學重切磋立言悉根柢人罕窺其深余能揭所
以韶年剛十七識君蕭寺裏遼瀋居接壤相距祇
十里息息印兩心盈盈隔一水彈指四十年形骸
忘彼此道義相切劘文史資砥礪寄興託謳歌揚
挖性所喜我詩率胸臆麤枝大葉比君身抱仙骨
詩筆融畫理氣或挾幽并韻必叩宮徵五言境獨
高唐賢奉遺軌七截尤擅場風格振浮靡長楚念
生民滄桑悲世紀哀哀小雅音惻惻楚騷旨緜緜

故國心銅駝傷棘枳清思自際盤真機空傍倚性
命濬靈源豈曰猶小技遼東諸老後騷壇成一子
慙我詩律疏學步未足擬詎敢汨其真沾丐薰蘅
芷此業已名山欣聞付剗削略抒心欲言阿所好
吾豈典則貽雅音知言其可俟

長沙洪味丹太守汝沖

汝沖初官遼左以爲地阻中原絃化不及東
土風騷蓋闕如也比年重遊瀋水幕府多暇
間與邦人士文酒清讌稍稍聞遼東三老各

以詩鳴康乾以降代有作者然終以未覩撰
箸若信若疑適岷源省長手石琴詩集屬勘
受而讀之泠然如海月天風孤桐自奏廼知
此邦風雅自有淵源惜嚮之失於物色耳敬
題短句以志欽遲

歸飛丁鶴下蒼冥老去霜笳已厭聽何意好音忽
吹送石琴廬畔韻泠泠

清能絕俗宛多風澹遠襟懷自不同解識羚羊工
挂角詎容秋谷妄談龍

遼陽黃黎雍祕書式敘

舫師刊石琴廬詩成屬敘一言敘望洋於師
門久矣何能贊一詞哉然嘗聞師之言詩矣
昔人云文無謬巧惟其是耳師輒曰詩無工
拙惟其真耳宣尼贊易修詞立誠詩亦詞也
真即誠也不誠無物何詩之有其歷久而猶
有存焉者必有其真者載以俱存所謂天倪
不做也又曰爲詩於唐宋明清以後何一字
不是陳言厥惟真機貫注尙可閱世常新否

則爲弔詭爲隱僻爲縟飾欲避陳因則去古
益遠非詩之正也師之言詩如此則師之詩
可知矣謹貢二律以證心源

夫子文章伯能爲正始音風雷生異響天地入孤
吟木落千山瘦雲開萬壑深尙多詩外事誰識杜

陵心

天上崑崙水奔流直向東汪洋乃如此搏激豈爲
功出以宮商徵原於雅頌風宛陵詩盡在添繡到

蠻中

溫州府 國子監

石琴廬·步象



詩賸總目

石琴廬

石琴廬詩集總目

詩賸

卷一

硯底草

五十七首

卷二

冰氈集

一百二十四首

卷三

雨鐙客草

五十七首

卷四

槐黃行稿

四十四首

卷五

囊羞集

三十七首

卷六

畫外草

四十三首

石琴廬詩賸卷一

瀋陽張之漢仙舫

硯底草

綺齡狝解聲律輒喜閒吟塾師謂妨

正課不敢坦然爲之偶有所詠書小紙壓藏

硯下因名硯底草云

起光緒庚辰迄甲申

春日偕同學諸子假遊郊外

斯遊當勝日吾輩正童年小隊魚成貫春郊馬不
羈野花多近水遠樹總含煙歸詠行歌答村墟夕
照邊

吹香詠

穉年鈍於讀書往往不能成誦日

車已沒燈火未來竊袖書至籬落間燃寸
香照字且吹且讀時附學尚氏家塾在蔬

圃中

讀書日西沈室黯無燈火攜卷豆籬東坐讀字恐
左口吹三寸香光抵螢一顆雖非目十行句讀辨
亦頗灰逐蠹粉飛煙並芸香裏一星太乙藜校書
無不可映雪雪易消隨月月易墮古人今若存捨
彼將效我香盡袖書歸籬角涼煙鎖數聲絡緯嗥
豆花垂朵朵

夢雲軒漫興

簾鉤搖響燕飛斜
窗近南榮拓絳紗
一枕冷香清入夢
東風吹雪上梨花

小齋

室大真如斗
拂簷楊柳斜
硯鈔新起草
瓶插半開花
容易書充棟
何須帳護紗
小窗南一角
蘿蔓上籬笆

小園

尺土逾球壁
江山寸寸量
敢云數弓窄
已抵百城

強抱甕園丁課分畦菜甲香萬花金谷滿徒自廣
田荒

小樓

凌雲非百尺何地卧元龍
鐙坐五更雨酒吹三面
風半遮高柳外四擁亂花中
遠岫雙眉列窺窗翠
可容

小橋

疏泉因礙路支木便成橋
夾岸野花發扶筇波影
搖柳風低燕翦萍雨避魚苗
沽酒自茲去杏帘村

不遙

小亭

莫謂茅亭小天形共笠圓四山吸青翠萬里瞰風
煙問字人千古嵌空石一拳翼然容膝地留待醉
翁眠

溪上

柳敬身入水挺出水
中枝漾漾鷗眠處
依依魚戲時
我來板橋外相對夕陽遲
欲借荆關筆洲邊補
釣絲

古寺

古寺閔蕭山木落人蹤滅撥雲一徑開寒僧掃黃

葉

閉門

閉門謝百營荒苔延返照澹然秋籬東獨對黃花
笑

九日口號

題詩吏催租登高風落帽悔吝動斯生吾寧安勿
躁盆移東籬枝座寄南窗傲風霜慘無情閉門詎

能到僕僕車馬塵誰識靜中妙黃花知此心英英
但含笑

河上送別王芟塘

離腸攪衰柳飛葉滿河干此地一爲別西風千里
寒不辭相送遠翻覺獨歸難踽踽來時路斜陽照
影單

春夜溪上

踏月步溪灣褰裳越林薄驚蛙解避人跳擲波間
沒溪風鎮日吹向晚猶未歇低搖萬柳條盪碎波

心月月落會有時溪流長不竭舉頭望明河低頭
弄苔髮愛此春宵光浩然清歌發

秋過溪南山家 初夏讀書東皋草堂水外

盤山蔚然林莽間時見炊影溪路沮洳未
可即也天寒水落略約可通迤邐至山背
有野叟闢山田半頃結茅其間落葉堆門
荒林自語徘徊久之了無塵迹

溪頭通略約山背敞林扉蘿壁蔓成穢石田苗不
肥驚蛇分草去浴鴨罌萍歸野徑苔花滿多應人

迹稀

山迴隱蓬華籬轉見壺瓜補屋牽蘿處縛犁耕石
家聽鳩課晴雨抱犢老煙霞相見話農事秋田蕎
麥花

試問漁郎渡言尋野老家蝸牛廬寄窄魚虎岸飛
斜露甲瓢兒菜霜藤盃子花灌園猶抱甕溪路踏
平沙

一犬吠寒雲人煙隔夕氛古田耕戰鐵虛谷答樵
斤分住車牛屋孤鄰石馬墳農閑誰共語翁仲對

斜曛

訪西澗隱者不遇

爲訪菊隱流山徑踏犖确小犬眠樹根客來殊未
覺幽人悵不逢風戛梧桐角

題秋江睡漁圖

蕭蕭夜風涼抱膝船頭睡但聽蘆荻聲不擁蘆花
被五更叫霜鴻覺來江月墜

嚴冬至南山寒林中

古木瘦參天夾徑森戟列凍雀忽高飛驚枝灑殘

雪

千林無一葉何處著煙絲夕陽下西崦穿影過東

枝

霽雪冪空山不辨樵人路一行陽韻野狐蹤歷歷穿

林去

飽霜樹逾瘦負雪山自肥微陽澹人影冷雲凝不

飛

嚴冬步窮谷將勿笑癡絕清極不知寒胸中有冰

雪

一豆閃村鐙去去殘陽沒不愁山路暝雪光皓於
月

大雪晚霽復至南山望中有作

四山雪未消一夜北風怒漠漠吹同雲重重封積
素雪深壓衡茅人家雪中住空山白茫茫安辨人
居處迤邐見行蹤知是樵採路夕陽澹欲收孤煙
裊寒樹

孤松

孤松羣木中繁柯蔽不現障銷九夏陰寒集三冬

霰風霜慘無情冰雪渺何限喻得後凋心萬卉凋
已徧嶽嶽寒松堂魏果敏公象樞齋名諤諤承明殿同列木
爭榮孤標金百鍊亮節自有真豈必歲寒見歲寒
然後知時窮知己晏雲日功臣表冰霜忠烈傳所
貴知良材勿待天道變

春暮偶成

每到春歸例有詩閉門忽過餞春時東風似欲催
詩債吹送殘花落硯池

怕見殘紅別恨添攤書幾日罷巡簷穿窗一瓣花

吹入悔向風前捲畫簾

春閨曲

春柳絲絲拂妝樓春鶯嚶嚶樓頭玉人晨起嬌
無語欲挂花幡空含愁花幡挂起花仍落閒倚朱
闌看芍藥吹鬢難禁婪尾風人比花枝猶纖弱

怡園四詠爲夢石君題

蘭友堂

論交徧海內喜登君子堂真香不入鼻無言心自
芳

樺禪室

秋心妙入禪夜氣清於水空際聞天香吾無隱乎
爾

竹隱居

入竹恐不深竹衆而我寡本不求人知人亦無知
者

花仙祠

夾徑萬花發香祠拜紫姑因知春有主不敢踐芳
蕪

十里河鎮六景 鎮踞遼瀋中樞當東南孔道
長河貫中古城枕右舊名虎皮驛明代全遼
志早經著錄而十里河之名亦見明史註喬
木廣衢蓋自金遼以來即爲巨鎮余生長此
邦留心里乘釣遊所及系以勻言

松壇晴雪 鎮北玄武壇前古松七株皆數
百年物撐空接蓋突若丘山三冬雪積不
亞終南陰嶺萬井增寒

徂徠千尺松峨嵋萬古雪神壇地百弓擅此兩奇

絕積霰浮雲端高寒霏玉屑

杏隴春霞 鎮西水外高阜細路別一小村

環宅皆紅杏春花怒發香蔚成霞隔溪望
之天然畫本

一雨漲新淥杏花紅四鄰誰道塞北地而無江南
春香中居不覺羨煞隔溪人

荒城晚照 鎮右高阜三面憑河城巋然踞
其巔地扼四衝應金遼用武所建夕陽登
眺遺堞僅存古木寒鴉增人憑弔

孤城控長河在昔重兵戍耕犁出斷戈不辨何年
鑄夕陽鴉陣來軍聲撼高樹

石牯濤聲 鎮北閭右渠口築牯壘石內下
如箕長十丈廣半之引東北行潦西達長
河每大雨時行羣流奔赴濤聲澎湃全鎮
皆聞

夜雨天瓢翻衆流合一組聲喧十萬軍夢破百千
戶曉起溼雲飛浪花猶可覩

盤山屏翠 鎮東水外山橫障如翠屏林可

樵石可釣鎮中踏青採藥恆必由之每當
雨霽嵐浮空翠飛來門巷皆綠

水外列屏山欲往阻樵路雨後漾空青嵐光竟飛
渡開門見山來何必山中住

古驛石銘 鎮北玄武壇外垣嵌巨石橫勒
虎皮驛三大字右鑄大明萬曆年月蓋鎮
之舊名也旁臨官道行人每駐馬觀之

六邊馳軍書四郊多虎迹伊誰寢其皮枕戈宿荒
驛遺銘勒馬看古道斜陽碧

鎮居雜詠仿竹枝體

天井懸鐙逼歲闌
光騰比戶萬星攢
迎年明黯占
家運共向竿頭百尺看

新年拜答苦周旋
門隙通名破五前
莫薄人情同
一紙猩紅費煞薛濤箋

六街歌管上元鐙
綠女紅男簇幾層
更說今宵襪
百病官橋柳外踱春冰

西古城頭卅角童
紙鳶跔跔夕陽中
無端演出風
箏誤斷綫吹來小市東

踏青時節麗人行眉畫春山翠黛橫何似野田挑
菜婦亂頭麤服過清明

採藥端陽趁繡閒香風拂面渡溪灣踏青認是前
遊路紅遍玫瑰花一山

鈿車十里碾芳埃容易風絲亂鬢釵照面菱花身
自佩隨時取月一探懷

蓮步輕移入寺門雲旛霞帔列神尊手扶老婢低
聲問第幾孃孃是子孫

生嗔阿嫂代陳詞料得芳心佛自知參罷慈雲嬌

不語低鬟合掌立移時

荷鍤朝朝集衆賓醉鄉那復計昏晨老奴睡起三更月更駕牛車送酒人

撞鐘廟祝啟神閭破曉三農聚一堂禮醮衣冠仍本色滿庭臺笠祀蟲王

誰販驂騑塞上回千蹏滾滾蹴黃埃五陵年少三河俠齊向長街賽馬來

殘冬遼西馬上遇雪 余生十九年矣從未

涉歷征途茲以世網猝攪殘冬匹馬奔馳

霜郊雪甸中黑月燐飛黃風怪嘯真覺淒
神寒骨動魄驚心不獨出門惘惘已也身
歷風霜發軔於此故紀之

殘臘征鞍孤客身黃雲十里黯沙塵馬頭衝雪狂
風起行過荒村不見人

雪深風緊夜迷茫火急心頭馬欲僵汗浹不知衣
似鐵可真奇煖是冰霜

自朱莊返營盤村途長日晚馬上有作

向晚猶單騎前途尙幾程日沈鴉背影雪碎馬蹏

聲野黯青燐出天寒素魄生營盤村不遠燈火一

星明

悶極作歌贈芟塘同好

松柏無異心芝蘭有同臭爲君發狂歌君必不我
謬君不見漢高箕踞罵儒冠一經獨抱徒酸寒又
不見賈生治安三獻策賦成鵬鳥悲貶謫今古渾
如貉一邱幾見書生博封侯胡爲乎矻矻窮年鑽
故紙抱書甘同蠹魚死丈夫小技雕蟲羞何如散
髮凌滄洲乘赤鯉跨蒼虬與君同到蓬萊頂上去

遨遊蓬萊弱水三千丈腳底奔騰翻雪浪長嘯一
聲人不聞仰天噓氣成白雲將雲搏作雙白鶴分
跨不用施韁絡罡風颯颯鶴翩翩倏忽飛上大羅
天拾得天錢大如手乃向廣寒宮中去沽酒廣寒
仙子雲爲裳雙手捧出紫霞觴流霞一吸詞源注
扶醉來作補天賦十二萬言奏玉京天顏有喜諸
神驚宣麻留向玉京住九沐三薰隆禮數更錫以
桂府之醪王母桃復賜以天孫親製雲錦袍不道
寵榮素所薄我乃與君仍向崑崙去採藥飽餌靈

芝足延年又奚管人世滄海幾桑田

能

公

能

不

物

理

石琴廬詩賸卷二

瀋陽張之漢仙舫

冰氈集 代畊以硯還讀我書一襲冰氈不廢

吟嘯風霜自挾即以名編

起乙酉迄庚子

秋日過田家

清商振林薄數家成一村林杪出炊煙路轉通里
門環宅種秋菜花開黃成墩雞鳴午飯熟牛歸溪
水渾卧犬驚客過狺狺吠籬根旁有曝背叟怡然
調幼孫問言聾不答笑指老瓦盆意必過客饑來
向乞盤飧覩茲熙皞象定知風俗淳我亦田家子

農圃樂自存胡爲背鄉井役役風塵奔人生貴適
志名利安足論感此倦行邁古道斜陽昏回頭望
鄉樹暮雲天際痕

古墓

李家峪
山中

亂山度征鞍墓門迎欵段陰風吹古藤狐鼠時驚
竄下馬看殘碑碑文半缺斷惆悵日將曛松濤來
天半

秋夜宿大安寺東廊

久坐僮先睡清談佛欲鷹梵宮高仰月禪榻冷疑

冰廢殿螢穿牖荒龕鼠拜鐙閒門風啟閉知有未
歸僧

雪廬夜坐

破窗殘月下老屋峭寒增瓦墜頽簷雪池凝突硯
冰霜華生土壁風影動書鐙永夜誰酬唱孤吟入
定僧

嚴冬登古白巖城 在遼城東行河北岸又

名衍州城

城抱山如玦峰堆石作臺朔風正蕭瑟高處獨徘徊

徊捧雪一松立劃冰雙槩來衍河三百里淘盡幾
雄才

峭壁雲中斷危城石上懸年光殘臘尾山勢大河
前水裂冰堆岸峰高雪照天南瞻華表柱化鶴想
丁仙

早春過摩天嶺

摩天羣峭鬱蒼蒼勒馬來登萬仞岡山面桃花山
背雪一般風景有炎涼

溪上

溪風盪我襟懷開溪水照我影徘徊潛鱗避我還
試我萍底吹將一沫來

一尺二尺綠藤水三枝五枝紅蓼花欲挹清光不
盈掬悠然神往天之涯

沙鷺窺魚覷迴汀波光如鏡開銅青銜尾飛來復
飛去流影照見雙蜻蜓

長蘆瑟瑟搖秋花短蘆刺水纔抽芽水禽飛去日
欲墮蘆底壓腔鳴一蛙

昨夜雨聲戰荻葦沙泉衝斷荻花壘蒲根水活鷗

未知鍼樣小魚偷掉尾

溪雲兜雨過前汀
天光水色涵空青
一絲風戰雨
蒲葉蜻蛉來往爲調停

牽牛

手植紫牽牛託根倚籬竹
修蔓走長蛇蟠上讀書
屋一夕秋風來寒花散芬馥
正好披我書來就花
下讀

暮春遊半可園

尋春特地蹋莓苔
樹底藤扉午正開
小犬枕頤眠

已熟不知花外有人來

園門懸牌
戒人防犬

蔣徑紅飛日漸長
掃花人倦睡花旁
蜘蛛似欲留春住
宛轉牽絲絆海棠

誰從東海袖將來
卵色盆中一笏苔
任跨青鸞遊

不到灌花水澆小蓬萊

盆石榜曰
小蓬萊

路轉芳藜見小窗
繞階淺翠發蘭苕
鏦然猛聽銀鉤響
飛出風簾燕一雙

玉棠蓓蕾壓簷開
閒數花鬚點翠苔
鸚鵡似嫌人立久
一丸紅豆怒拋來

心畊草堂坐雨

孤館龍蛇繞空林鳥鼠潛竈煙炊溼葦簷溜織長
簾屋漏書頻徙庭漚屐半淹欲尋沽酒路雲水沮
青帘

春日遊白塔寺

在遼陽
西郭外

香雲如夢叩禪扃天半驚風響塔鈴撲刺山禽忽
飛去梨花一陣落空庭

歸然梵碣蝕苔華古刹尋碑日未斜讀徧斑爛蚪
蚪字塔尖移影過梨花

浮圖七級出精藍
笠屐來參古佛龕
記得家山憑眺處
一痕塔影指天南

讀書北郭散步東郊柳
風花雨之間得六言
小詩數首

榆莢低纔著雨
麥苗淺不成波
陌上行人已遠
鷓鴣猶喚哥哥

一雨遙天初霽
空青浮過春城
約是嵐光樹色
教人辨不分明

雨後長隄小立
柳條垂比人低
我無雙柑斗酒
又

手來聽黃鸝

楊柳煙籠竹竈杏花雨滴茅簷絕似江鄉酒市可
惜少箇青帘

柳陌幾行綠黯麥田一片青腴小雨欲住不住尋

花間煞春駒

名

根交地何厚薄樹老春有後先古槐猶無一葉榆
已串串垂錢

立夏日保安寺雨中看芍藥 春歸矣可奈

何散步郊郭小雨忽來趨避之不知有寺

而與寺值不知有花而與花遇觸境生緣
適然成賞詩以紀之

笠衫偶過講經臺紅藥翻階滴雨開禮佛無心僧
不識此行應爲看花來

半褪宮衣御苑風鏤金曾表殿春功如何十二紅
闌種邂逅荒龕冷雨中

金帶同沾玉殿香逃禪應憤亞花王也如繡佛人
參懺風雨維摩病榻旁

燕郊走馬踏芳埃野刹重看繭栗開記得垂鞭廣

恩寺曾隨蝶影到豐臺

惜別東君意太癡將離宛雨惱情絲
低眉佛對花微笑春去春來總不知

婪尾風吹絳玉姿佛天春去不多時
惜花花亦同無語叉手空階看雨絲

重遊白塔寺

尋碑重到古襄平負郭琳宮舊著名
甘擅井泉專

利市

井水製飴專
利名塔糖

高翻塔影過春城

城內四大廟
池中全塔畢

現雲房香擁梨花夢風案經掀貝葉聲
入座何來

青照眼馬鞍山翠撲軒楹

亂後偶檢劫灰拾得錢塘苻葯林春鳧詩稿
殘本裝竟漫題

祖龍燔贖壁經藏又撥秦灰拾斷章若比琴材出
爨火可應我是蔡中郎

誰傳詩卷到天涯憶煞錢塘處士家倘許湖山扶
夢到擁門香雪立梅花

寒夕村邊散步

步步雪聲碎蕭閒負手吟殘霞低遠樹澹月上空

林繞巷驚寒犬爭枝擠凍禽誰家添夜課鐙火小
窗深

雪夜

濁醪香沸泛銀槎有味青鐙雪案斜一卷漢書和
酒讀不須清冷嚼梅花

簌簌寒窗紙欲鳴暗風吹雪打柴荆凌河記得宵
停泊篷背驚沙似此聲

閻生筆歌 生名士開字梅一籍金州振奇

士也甲午中東之役州陷敵民率避兵去

生獨落落戎馬間懷奇蓄憤欲有所伸敵
軍方窺旅順地阻叢山募嚮導謂生可賄
以金不從脅以刃益怒罵敵不解華語而
同文輒抽筆伸紙所書皆忠憤之詞劍槊
齊鳴筆走不輟敵怒遽擁出山麓剖心肝
以死噫閻生此筆足以撐天地泣鬼神矣
因爲作歌

在秦張良椎在漢蘇武節奮椎難擊博浪沙抗節
豈比胡天雪非椎非節三寸毫竟憑兔頰探虎穴

千軍橫掃風雨驚披肝瀝血凝成鐵飲刃寧惜嚴
延頭振筆直代常山舌頭可斷舌可抉刃可蹈筆
可折凜凜生氣終不滅吁嗟閻生古義烈閻生著
籍遼海東繫心家國身蒿蓬策衛喜讀劍俠傳斬
蛇恨無隆隼公海覺無端騰戰霧天塹鴨江竟飛
渡席捲已下金州城氈緹更覓陰平路識途馬老
用閻生衝冠義憤豈能平直將易水悲歌氣激作
漁陽搥鼓聲閻生髮衝敵目笑不通重譯舌空掉
抽筆憤書忠義詞飛雪刀光迸出鞘刀邊罵敵怒

裂眚擲筆甘就刀頭死心肝攫出泣鬼神淋漓血
染山凹紫烏虜皇朝聖武開神皋鼓鞞將帥思賢
勞九連城頭將星落顏軍斷後誰盤稍東南銅柱
沈江濤太阿倒柄憑人操十萬橫磨豈不利一割
無用同鉛刀胡爲乎刀圍大帳筍鋒密挺然獨立
閻生筆

漁父詞

蘆花如雪晚風涼釣得銀鱗徑尺長且換村醪謀
一醉魚租催到再商量

幾日秋霖漲遠沙
新波高過碧蘆花
鱸魚上市西風起
不識何人正憶家

自勵二首

白璧出巖阿抱璞殊無奇
匠石幾磨礪成此冰雪
姿瓦礫詎同伍壇坫相與期
皦皦易召污休云涅
不緇一朝蒙垢穢被濯恐已遲
尺瑜累寸瑕胡弗慎護持

根剝花必萎本傷樹必枯
即物已如此於人豈有殊
根本抑何在方寸含靈樞
理欲爭一息義利分

兩途常使夜氣存自有萌蘖蘇捫心蔑乃良譬木
伐其株榮枯豈由天栽培端在吾三復立命篇旨
哉言不誣

過都虞處看小桃紅

一簇穠華掩畫楹春深瑣院雨初晴踏青笑我期
頻爽開徧桃花未出城

暮春野行

細麥平疇影新蒲野水香雲兜殘雨過風透袷衣
涼遶岸蛙驚避穿林鳥未防和鳴聲上下高樹正

斜陽

水鳥白於雪翩然背客飛
點波捎作響滅影入於
微極浦饒芳草春流遍
夕暉蒼茫神與往溪上立
忘歸

榴花二首

午節歸十里溪村草堂作

午窗風掠絳裙香
旅夢依稀繫鱗堂
記得讀書萃
升院榴花噴火過端陽

珊株玉盞小安排
花吐晴霞照雅懷
嬌女幾時偷
摘去猩紅綴上髻邊釵

珍珠梅

五月開早梅
瑟瑟如明珠
欲摘持贈誰
佩在紅羅襦

八寶蘭

八面玲瓏錦一莖
婉嬋香盈盈
笑月姊月姊
七寶

裝

金錢菊

莫笑陶彭澤
囊空每賒酒
采采東籬東
金錢日滿手

碧玉桃

仙子洞口花美人面血迹扇底弔香魂何時化爲
碧

題桃花扇傳奇

半壁江山一劇場譜將絃管話興亡不知扇底桃
花血博得千秋淚幾行

東林黨禍徧神州復社揚波國運休餘沫南朝風
自鄼鼓伶扇妓亦清流

後庭花唱錦纏頭顧曲君王總莫愁爭似琵琶江

上婦繁華夢冷四絃秋

不點江防點教坊風流天子本無腸六朝殷鑑何
曾遠歌舞臙脂辱井旁

粉黛香中作帝王三生杜牧等輕狂獨憐建業新
朝運不及揚州舊夢長

繁華六代此承祧璧月瓊花豔福消最是移人金
粉地何嘗天子誤南朝

水榭徵歌借管絃文章氣節兩難全大闡兒是真
才子傾倒新聲燕子箋

闔門屈膝阮囊羞又逐炎塵拜馬頭防亂誰知灰
未燼春鐙燄裏錮清流

清濁分流迹已陳南朝世局總翻新珠匳卻後香
巢覆黨禍鉤連到美人

揉碎桃花面血香代將豔李賺強梁最防卻扇華
鐙下照見徐孃半面妝

扇頭宛蹟綴桃花妙手靈心擅畫家四鎮淋漓飛
戰血可能點遍武陵霞

扇底桃花血點斑映花人面見應難冰紈絨寄春

鵑淚宵作燕脂一列看

將壇高築武昌城抵掌軍門楚兩生帷幄誰參軍
國計一堂狎客萬驕兵

壁壘西南繫重輕北讐未復莽東征坂磯劫斷英
雄氣誤我空呼左夢庚

鐵鎖沈江鐵甕開降旛一片北兵來東南半壁誰
檣柱孤立梅花一將臺

跌宕鶯花筆一囊豈知誤國是文章興亡試問秦
淮水衰柳寒鴉半夕陽

歌舞君臣共漏舟繁華誰問水東流江風聽唱漁
樵曲賸水殘山一笛秋

媚香樓畔冷春鴉閣部墳前滿月華玉貌丹心共
千古桃花香接萬梅花

興亡譜出小朝廷直筆南朝抵汗青千古杜陵詩
作史詞壇今見孔云亭

徵歌愁聽杜鵑聲野史亭開忍淚評倘作哀江南
一賦可應我是庾蘭成

寒花

寒花媚秋日
拚抑多幽姿
不爭春卉妍
獨倚西風時
露涼聊自濯
香清人未知
時有瘦蝶來
飛上籬下枝

秋柳

西風影裏舞
行行條綰秋
光短復長絕
塞鴈歸官渡
雨曉鞍人話
驛亭霜莫驚
無意垂青眼
正復多情繫
別腸憶煞江
鄉鱸膾好
蕭疏一帶映
漁莊

秋草

鬪草歸來忽
至今尋芳故
徑怕重尋
玉關馬散荒

煙莽金谷螢流宿露深
羈客西堂涼舊夢美人南
國瘁香心江皋一片無情
綠冷落當年澤畔吟

雙槐 在瀋陽書院講堂前

雙槐交蔭講堂青霧榦
霜枝望欲冥隔樹風來人
未覺兩三黃葉下空庭

九日凌晨陪都城樓登高即題樓壁

巖關鳴曉角飛步上城頭
未醉陶潛酒來登王祭
樓黃花故園淚白鴈塞天
秋掃壁留鴻爪他年記
壯遊

躡屩疏星外憑闌萬象前
煙扶孤塔直天抱一城
圓市亂人如蟻樓高客欲仙
大風豐沛起秋氣莽
蒼然

占得危闌角秋高氣不降
山銜日輪半風掣鴈行
雙宮樹黃於瓦樓天碧入窗
六街霜未散遙聽曉
鐘撞

更上一層樓望天柱諸山

一歲一重陽佳會不易逢
樓更一層上日須千里
窮全城抱元氣萬家茫
混中孤塔矯不羣直上凌

虛空俯瞰遠市人蠕動如微蟲將毋人視我身亦
粟粒同飄衣忽欲仙西北來驚風怒驅白雲飛連
山挾俱東雲走山亦走雲去山仍崇千峰插天末
秋嵐青濛濛

秋感

彈鋏經年賦客遊登高幾上仲宣樓燕拋風翦驚
窺幕鷹刷霜翎想脫鞴滋味何堪戀雞肋功名終
恐誤蠅頭會當投卻毛錐子匹馬縱橫戰壘秋
一襲冰氈百衲琴幽蘭譜出孰知音青鐙照雨炎

涼味黃葉驚風去住心劍發新硯藏宵露棋留殘
局縱猶擒桔槔雖便終何用抱甕千秋想漢陰

風雲百變歲華遷秋水盟心總湛然豈爲羨魚方
結網常思飲馬尙投錢酒經醞釀甘酸味琴費安
排大小絃盼爾爭春桃李好可應回首憶當年

閒將明鏡手摩挲與結心盟問若何肯向浮雲爭
變幻生防真氣爲銷磨邴原矯矯三霄鶴黃憲汪
汪萬頃波把劍中宵起長嘯抗懷愧負古人多

見市兒飼鷹有慨

天地寬如此英雄一飽難饑來甘就食嘑與豈心
安野闊重圍合秋高大漠寒誰爲解絛絆縱爾奮
霜翰

贈董聘儒

達川太史喆嗣曾
統吉林靖邊軍

西清家世舊聲華曾讀遺編滿五車誰道書香非
將種連江旗鼓照松花

曾縮軍符塞上行歸來面目尙書生劇憐小范耽
高卧閒煞胸中十萬兵

梅影

幻出寒梅格橫斜見別裁化身香外現清暈夢中
猜倩女魂離竅癯仙骨脫胎夜深涼月轉移上小
窗來

初冬送葑溪君歸山左

老樹搖風聲怒號塞鴻十月悵不翺千山萬山雲
氣高雪花飛上征人袍征人袍故人酒淋漓酒染
袍襟舊飲不成歡辭欲行欲行不行空搔首憶君
橐筆海上來落落逢誰青眼開家投張儉飄零後
劍拔王郎磊落才悲歌斫地出門去破硯殘書充

行具頻年勞燕歎分飛今歲林泉喜同廬有時我
叩子雲亭問字親攜雙酒瓶奇文欣賞浮大白一
編新草太玄經君方撰西
銘衍義有時君來陽羨屋花猪
登盤酒初熟從來食客薄馮驩長鋏不歌食無肉
君不
肉食春風扇野春草香偕君同遊桃花莊古寺尋
碑不辭遠行吟笑我成詩狂夏雨含滋硯池活訪
我文窗看塗抹扇頭索畫米家山墨汁三升爲君
潑驀地涼秋襲客幃尊鄉夢見鱸魚肥流光易逝
豈能再他鄉雖好不如歸不如歸尙依違昭陵石

馬弔斜暉銅鞮吟成霜菊老布帆挂起雪花飛風
雪挽君手勸君傾餘斗爲君發浩歌問君肯聽否
君不見日暮攜手上河梁塞雲千里空悲傷又不
見柳色青青渭城雨陽關三疊斷人腸黯然魂銷
者惟別而已矣而况我與君六載稱知己既不能
咒取海上石尤風吹轉歸帆回遼東又不能今世
復遇費長房縮地千里同一堂徒挽征驂發浩歎
君乃指點呼我看海北紅杏重開花海南客子仍
離家安得春風可人意頃刻紅杏吹成霞杏花渺

渺雪花落酒杯以外即天涯

客中寒夜聞笛

宛轉水龍吟霜高月未沈伊誰三弄笛使我一沾襟
遊子頻年淚天涯此夜心明朝望鄉處千里白雲深

暮春山行見桃花口占

忽逢桃花林便有仙源意六合秦併包豈別一天地

埜鳥聲格磔古苔痕斑斕人蹤不到處桃花紅一

山

巖邃石骨青
礧陡苔鬚碧
樹底瀉紅泉
應是桃花液

山靜日如年
仙源果何處
問花花無言
流水杳然去

汝康入泮寫墨蘭爲賀并系以詩

挺玉丰姿想謝家庭
階披草辨春芽靈根深蘊連
珠蕊小試東風一箭花

得分化雨潤孤芳
芹藻欣聯泮水香
一自猗蘭傳

入操花開常願傍宮牆

斗子峪道中

路入連峰畫不如秋嵐潑眼雨晴初曉鞍不道征
塵苦驢背看山當讀書

秋村晚眺

薄笨車歸薄暮天村墟收稼趁霜前早禾穗積場
頭露新秫香炊屋角煙渴馬放蹄奔晚溜饑烏敲
翅下秋田老農一飽黃昏後涼月瓜棚話有年

櫪馬

漫論千金價空留百戰身車鹽成重任棧豆亦殊
恩上駕騰天路邊功競玉門有人生髀肉太息自
聲吞

韓鷹

緜勒盤空氣時時一攫身天高思整翮腹餒暫依
人維繫聊相習英雄豈易馴霜翎勤振刷佇爾出
風塵

移館屈氏三餘堂
地在本溪萬山中環青

面綠漫題志勝

林壑東南美雲山隔幾重何期安硯處洽在萬峰
中書幌浮空翠塵衣拂輭紅六年帝城住如鳥出
樊籠

曉晴

夜雨瀟瀟萬嶂昏溼雲吹散見朝暎怪他門巷青
如潑八面山光聚一村

晴光曉色聚芳郊雙燕初來未定巢香染烏衣何
處宿昨宵小寓杏花梢

溪山遊眺

山迴路轉石岷岈細草茸茸一徑斜無意尋春春
自好東風開遍野棠花

一水環山漾碧沙沙平水淺少魚蝦忍饑老鶴癯
如我悄倚汀蒲看浪花

臨流小憩背斜陽到岸山如馬勒韁紫翠千峰爭
倒影坐看水底浴嵐光

居然欬唾帶煙霞石徑尋詩手自又敢向名山爭
一席吟風松老亦詩家

松樹嶺

不見山真面喬松密密栽直將萬松樹堆起一山
來樵路深難測仙雲鬱不開峰頭誰踏得只許鶴
徘徊

山村雜詠

漾綠溪邊白石磯環磯三面柳依依魚稀水淺無
人釣讓與村孃坐浣衣

誰墾山腰數頃田結廬山腳住年年耕犁卸卻天
方午舐犢黃牛屋上眠

夕陽笠影牧兒還行遍山坳又水灣村路迴環牛

自識倒騎牛背看春山

村畔服賈一牛牽山市風猶太古天尺布斗梁交
易退不知何物是金錢

山行書所見

散步踏空山驀然逢老叟白髮散銀絲危坐青谿
口意必古仙人棲此巖穴久肅然起予恭端立爲
拱手叩以長生訣不答但搖首又疑是隱流抱道
遁林藪因與論天人精理爲細剖更勸出建功雙
印繫肘後胡耽林壑情簪纓等敝笱詰問屢更端

彼終無可否官骸豈不靈
惘然同木偶始知癡且
聾胸中烏所有一笑下
高厓松濤天半吼

日晚

日晚尙風聲梨花吹未歇
西嶺暮煙生斜陽淡如
月

暮春散步至松樹嶺

花落鶯先老松深客欲仙
獨來行樂地高詠暮春
天古蘚吞樵路新苗沃澗
泉誰家住林角一縷颺
炊煙

萬松深處

萬松深處墨爲天
風雨俄驚晝欲玄
豈道陰森林影外
日長山靜正如年

山居清暇遊屐所至輒占小詩寄興

尋得桃花流水抱
雲偶棲碧山煙霞
豈云世外蓬壺端
在人間

門俯水一衣帶堂
抱山半玦環除卻
野人問字只有白
雲往還

青到筆牀茶竈遙
遙山可一窗比似
龜蒙甫里惜

少一段松江

十里五里巖壑三家兩家煙蘿百年樹有仙意四
圍山比人多

掃天萬松馬尾穿雲幾徑羊腸行到林陰豁處綠
凝一片斜陽

飛鳥與人爭道歸牛先我到村回看纔題詩處東
峰已被雲吞

至東山古松下偶成

座少談心侶出踏東南峰孤松挺奇姿突兀與相

逢槃材鬱梁棟勁節凌霜風仰止意殊切盤桓情
獨鍾此鄉落落無好友何幸邁此蒼髯翁米顛袍
笏拜石丈我欲兄呼此老松風濤刷耳聲欬通兄
事弟蓄松樂從翩然展拜下峰頂四山蒼翠來空
濛

沿溪散步至東山最深處

秋嵐四映氣氤氲心醉溪山酒並醺一水分流因
礙石萬松合抱爲藏雲泉通汲路穿林過谷應樵
斤隔嶺聞羨煞誰家巖半住不知人海有塵氛

路轉峰迴水折流閒從沙尾溯源頭攀藤自達泉
飛處拾果方知樹釀秋雲本無心同我嬾山如有
意與人遊愚溪愚谷援前例小記何妨續柳州

拳氛日熾故鄉駐兵聞警歸途中作

太白星占兆主兵

五月太白晝見占主兵象

鄉關戎馬忽縱橫

十年枉獻邊防策一路愁聞野哭聲里菊花開新

戰壘妖蓮蔓繞舊神京茫茫天意誰堪問滿目煙

塵匹馬征

温河平 函 公 館

